

Adimen urritasuna dutenen alde kanpaina bat antolatu du Atzegik

'Ez dakizu zer sentitzen dudan. Lastima! Sentitzen dut' da leloa

Arantxa Iraola / Donostia

Ohiko bihurtu dira azken urteotan Gipuzkoan adimen urriko andra-gizonen bizimoduaren berri ematen duten kartel, irudi eta mezuak. Urtaro honetan agertzen dira beti eta talde bera izaten da urtero kanpainon sustatzaile: adin urrikoen alde Gipuzkoan hamarkada ugari lanean daramatzan Atzegi elkarteak.

GIPUZKOAKO FORU ALDUNDIAN Ez dakizu zer sentitzen dudan. Lastima! Sentitzen dut kanpaina aurkeztu zuten atzo. Atzegik antolatutako kanpaina da, lehendik egindako beste hamaika kanpainaren ildotik datorrena. Kanpaina hau sustatzeko Gizartekintzaren zein Kutxa Fundazioaren babesa izan dute. Hala, atzo, ilusioz beterik hitz egin zuten Atzegiko kideek kanpainaren aurkezpenean: «Ulertu behar dugu adimen urria dutenak ere, pertsona direla. Haien premia afektiboak eta gureak igoyalak dira».

Aldarri hori ozen zabaltzeko ahalegina egingo dute datozen egunetan. Hala, aipatu kanpainaren itzalean hainbat hitzaldi egingo dira eta ekitaldi nagusia larunbatean izango da Donostiako Kutxa aretoan. Izaera ludikoa izango du, ondo pasatzekoa. «Sarri askotan adimen urrikoen inguruko ekitaldiak oso serioak diren ustea dago, edo eta bestela beti eskean ari garen itxura hartzen dugu.



Kanpainarako egindako kartela. Honelako bete da egunotan Gipuzkoa.

Hori apurtu nahi izan dugu, ordea. Festa bat antolatu dugu larunbaterako», azaldu zuen kanpainaren ardura-dun Kani Peñalvak. Adimen urriko pertsonak izango dira festako protagonista nagusiak. «Ekitaldiaren bukaran, batek pianoa hartuko du, besteak soinu txikia... Ahal dutena egingo dute, ez baitira perfektuak, baina beraien espresibideak dituzte».

Aurrera egiteko, gogoz

Atzo, halaber, iragan urteko jardunaren balorazio baiko-

rra egin zuten Atzegiko ordezkariak. Besteak beste, Deba Garaian -Aretxabaletan zehazki- adimen urria dutenentzat etxe bat zabaltzeko bidea abian jarri zutela azaldu zuten, eta hori arrunt urrats baikorra izan zela. «Izan ere, zonalde horretan baino ez zaigu falta era horretako etxe bat», azaldu zuen elkartearen lehendakari Jose Luis Zalduak.

Egun Gipuzkoako 1.895 familiaren orientazio eskakizunak erantzuten dira Atzegiren bidez, eta guztira elkartek 3.000 bazkide kolaboratzailearen laguntza jasotzen du.

Eguzkiren ustez, lurralde antolaketa da Ormazabalen gestioaren «porrot itzela»

■ Europak dioenaren kontrakoa egiten dela salatu du talde ekologistak

Luis Karlos Garcia / Gasteiz

LURRALDE antolaketari buruz Euskal Herrian indarrean dauden politikak «egungo arazo larrienetako bat» direla ohartu du Alberto Frias Eguzkiko bozeramaileak, eta zehazki Patxi Ormazabal Jaurlaritzako kontseilariak EAEn egindakoa «porrot itzela» dela esan du.

Friasek gogora ekarri zuen Europako Gutunak dioena

lurralde antolaketaren gainean: «Lurralde antolaketak adierazpen espaziala izan behar du gizarte guztien politika sozial, ekonomiko, kultural edo ekologikoari dagokionez». Eguzkiko eledunaren hitzetan, Europako arautegi gorenaren ildoan aurkakoak dira Euskal Herriko hainbat ekimen.

Halaber, «partehartze publikorik gabeko prozesua» egiten ari dela salatu zuen.

Horregatik, Eguzkik eztabailean egingo du maiatzaren lehenengo astean «nahitaezko debata» hartzeko asmoz; Arabarako Bilbon indarrean dagoenaren antzekoa eratu nahi du, eta bitartean, azken bi urteetan geldirik izandako Gipuzkoakoa noiz zuzpertzeko zain dago. Friasen esanetan, «kanpaina instituzionalak dienez, Arabak ba omen du plan bat, nahiz eta edukia inork jakin ez».

laburrean

■ Bizkaiko Diputazioak eraikinen balorazio automatikorako arau teknikoak onetsi ditu

BIZKAIKO Foru Aldundiko Ogasun eta Finantza Sailak eraikinen balorazio automatikorako arau tekniko berriak jarriko ditu martxan datorren ekainaren batetik aurrera. Arau berri horiek biltzen dituen foru dekretua iruzur fiskalaren aurkako borrokan pauso oso garrantzitsua dela azaldu zuen Fernando Olmos Ogasun eta Finantza diputatuak atzo. Arau tekniko berri horien bitartez, balorazio eredu estandarizatu bat ezarriko da, segundo gutxi batzuetan eraikinen merkatuko balorea ezagutzea ahalbidetzen duena. Sistemari eraikin bakoitzak duen katastro zenbaki finkoa baino ez zaio ezarri beharko.

■ EAEko bidaiari kopurua nabarmen hazi da, batez ere Gipuzkoan

JOAN den hilabetearen 111.455 lagunek hartu zuten ostatu Euskal Autonomi Erkidegoko (EAEko) hoteletan eta bestelako establezimenduetan, aurreko urteko sasoi berean baino % 10 gehiagok. Probintziak, hazkunderik handiena Gipuzkoakoa izan da (% 18); ondoren, Bizkaikoa (% 5), eta azkenik Arabakoa, non igoera % 2koa izan baitzen. Bidaiari guzti horietatik, %79 Espainiatik etorri ziren. Atzeritarrei dagokienez, Frantziatik (4.200), Erresuma Batutik (3.400), USA-Kanadatik eta Alemaniatik (3.100) etorritakoak aipatu behar dira.

■ Anorexia eta bulimiaren aurkako plana lantzea eskatu dio Eusko Jaurlaritzari PPK

DATOZEN hiru hilabeteetan Eusko Jaurlaritzak anorexia eta bulimiaren kontrako plangintza zehatza lantzeko lege besteko proposamena aurkeztu zuen Arantza Quiroga PPko parlamentarioak Eusko Legebiltzarrean. Gaia ikuspegi anitz batetik lantzea aurreikusten du proposamenak, eta halaber hezkuntza, osasun eta gizarte gaiak jasotzea. Quirogak nabarmendu zuenez, «bulimia eta anorexia ez dira gaitz soilak, gizarte fenomeno baten ondorio dira. Horregatik, Administrazio Publikoko sail ezberdinek beharrezko ekintza eta neurriak hartzea eskatzen dugu».

■ Trenak urtean 9.400 milioi pezeta aurrezten dizkio EAERI

TREN ZERBITZUAK urtean 9.400 milioi pezeta (376 milioi libera inguru) aurrezten dizkio Euskal Autonomi Erkidegoko (EAEko) gizarteari. Karlsruheko Unibertsitate alemanak eta INFRAS AG kontsultora suitzarrak egindako ikerketa baten arabera, trenaren erabilera aurrezpen nabarmena sortzen dio gizarteari; besteak beste, beste garraio mota batzuekin alderatuz gero istripu kopurua txikia izan, kutsadura maila eskasa eragin eta zarata gutxi sortzen dituelako. Aipaturiko azterketa horren arabera, 1994. urtean trenak EAERI ekarri zion aurrezpena 8.797 milioi pezetakoa izan bazen, iaz 9.430 miliokoa izan zen.

■ Oinazeari aurre egiten laguntzeko unitate bat atonduko dute aurki Gasteizko Santiago ospitalean

OINAZEA dute zenbait gaixotasunek ezaugarri nagusi, eta eritasun horiek sofritzen dituzten gaixoei laguntzeko unitate bat atonduko dute aurki Gasteizko Santiago erietxean. Unitate horretan gaixotasuna ikuspuntu global batetik landuko dutela iragarri zuten atzo ospitaleko arduradunek eta, besteak beste, gaixoei laguntza psikikoa ere izango dutela. Unitate hau abian jartzeko data zehatzik aipatu ez bazuten ere, aurreko burutu beharreko planen artean dagoela azaldu zuten. Horrekin batera beste hainbat berrikuntza lan ere egin nahi dituzte ospitalean. Oinazeari aurre egiten laguntzeko unitateari dagokionez, ez da izango EAEn ildo horretan egindako aurrengo esperientzia, Txagorritxuko ospitalean jada martxan baitago honelako unitate bat.

■ UGTk, CCOOk eta ELAk gogor kritikatu dute Bideko Amaren ospitalean egin nahi duten birmoldaketa

IRUÑEKO Bideko Amaren ospitalean birmoldaketa lan batzuk egin nahi dituzte, eta ondorioz, ohe batzuk gutxiago izango ditu gaixoentzat. Asmo hori gogor kritikatu dute UGT, CCOO eta ELA sindikatuek. Dauden ohe guztiak maiz betetzen direla esan dute, eta premiazkoak direla. Kezka azaldu dute, gainera, ohe horiek desagertzearekin bat lanposturen batzuk desagertuko diren susmoa dutelako. Erietxeke zuzendaritzari egin asmo dituzten birmoldaketa guztien berri zuzena emateko eskatu diote sindikatuek.